

高 鶴 年 居 士

名山遊訪記

全 一 冊

附 增 補 及 山 中 歸 來 略 記

提起精神行得，
脚跟把定立得，
源頭尋着坐得，
放下萬緣臥得，
如是，來得去得，
，餓得凍得，萬
物靜觀皆自得。

金山楞伽小隱題

上 海 佛 學 書 局 印 行

高鶴年居士名山游訪記

吳興王養書



鶴年居士名山遊訪記序

古之大德高人痛念身世靡常未明己躬大事爲之割愛棄榮涉海登山尋師擇友參求善知識於苦空寂寞之濱決擇死生發明向上每每於明眼人前揚眉吐氣或於棒喝之下因地一聲忽覺身心脫落如寒灰發燄闔室頓明將無量劫來生死情根一時拔出當下猶斷索師子跳躑縱橫自在遊行無纖毫繫絆所以稱爲大力丈夫此吾出家人發足參方之行徑也悲夫去聖既遙人心非古此道寥寥近代以來離行脚者不無其人較之古人奚啻霄壤得三昧者曾幾人乎覓其如鶴年居士者亦不多見高君夙植靈根英年立志痛念生死絕欲捨家國內名山無處不歷廣求知識無一不參具善財知見舉目而皆入法門遊華藏山河到處而無非寶所三十年如一日近聞息影東海勞山其靜無雙其樂無喻此種三昧海上諸居士不肯讓高君獨得要與天下人共之

歲在辛酉世尊成道日諦閑謹序

名山遊訪記序

人之智識非學問閱歷莫由開通而天下名山聖道場地最足以感發人希聖希賢之志其有關于立身修業成德達才也大矣故古今負己立立人自利利他之熱心者每不以跋涉爲勞以期凡所見境凡所悟入皆資益于吾身心開發乎智識也古之周徧遊歷者有千歲寶掌和尚中天竺人在天竺約五百年于漢末來此方歷三國兩晉宋齊梁陳隋至唐高宗顯慶二年三千七十二歲方始入滅以故凡南北名山聖道場地無不親歷其地而住止焉至明末時紫柏尊者亦復徧歷名山以日行三百餘里雖無寶掌之壽其所遊歷可與寶掌相齊近世緇素中唯高鶴年居士遊歷最爲廣遠凡四大名山五嶽終南天臺雁蕩羅浮鷄足武當雲居廬岳黃山或一至者或二三至者凡所經過之土地人情與夫古迹勝境及道場寺宇并高僧名士所有事迹根據語言問答各皆備載一可以慰不能行脚者無由得知聖道場地之勝迹遺憾一可以作初機學人尋師訪友之一大方針以故民國元年佛學叢報曾

錄之以餉同志今者王一亭許止淨聶雲臺狄楚青簡玉階諸居士又欲特作一冊俾閱者備觀其全亦未始非入佛海之前導也釋印光撰

鶴年居士名山遊訪記序

欲開知識端賴學問及經歷非經歷孰能親證其事非學問難以洞晰其幽古人有云諸法中有絲毫不透者便爲一絲毫之所礙是故昔有八十行脚九上洞山一鉢千家孤身萬里總爲訪道明心求解脫而已至若周遊名勝徧涉大川禮聖化之道場覽奇麗之名蹟亦爲開拓心胸裨益識智也夫物皆有可觀觀皆有可樂此樂也豈物之樂哉其寓境而遊心超然乎物外而得物理之融通者也若斯遊者無往而非道矣所以古之遊者遇上士而問道逢相契而談心未自信者而求法未自證者而求證千歲掌公自天竺徧遊東震開峨眉之道場三藏奘師由中原遠涉西乾立唯識之宗旨自古勝遊烏可勝紀皆無適而不以道爲利也豈彼寄懷於風景選勝於詩賦者所可同日而語哉高鶴年居士自幼業儒具信佛理禪參知識教徹道源

由是廓懷縱志足跡所經殆徧天下含道傾心瞻禮聖蹟巖棲谷隱梵刹靜居無不參訪凡所經歷筆之於書久而成帙曰名山遊訪記而其名勝古蹟賢聖道場示諸掌矣巖居茅隱晦迹深修接乎目矣居士心與境融理隨事徹故其觸處提撕隨緣指示之處清談道話雅合玄機讀者當離文字相求之休作尋常遊記觀也見者咸請刊印以流通既問序於余不揣固陋用贅其端焉時庚申冬

釋迦如來成道良辰天臺山觀日子興慈謹撰

名山遊訪記引

鶴年居士早歲發心頻年參訪足跡殆徧天下茲以雲水所經著爲遊訪之記居士平日固服膺宗門者是以觸處提撕不離方寸百城煙水終歸彌勒之樓一宿因緣遂識曹溪之路可謂依正無礙心境雙融矣讀者當離文字相求之莫漫作尋常山志水經會也民國元年濮一乘附識

名山遊訪記發刊序

震旦山水之勝。自康樂柳州以後。俊遊寂寥。至明末乃有徐霞客。其遊踪最遠。紀載亦獨富。謝柳皆由儒入佛。世盡知之。霞客雖不以佛者名。而西參大寶法王。負禪侶靜聞之骨。以葬於迦葉道場。則固亦行佛之行者矣。用是知惟學佛者爲能遊。遊爲不虛。彼騷人墨客。塵聲俗軌。縱有濟勝之具。皆入寶山而空回者也。鶴年居士。早發道心。嚴事石埭楊先生。雖無謝柳之文。而抖擻邁往。足跡遍名山。不讓於霞客。所爲遊記。曾略載於佛學叢報。顧叢報至癸丑年卽止。首尾爲一載。而居士行脚。則有趙州八十未休之概。積稿未刊者居大半。比以嚶求之切。始料簡付刊。居士嘗語予。謂初願未及此。山行野宿中。每草促不及爲。多追憶而補紀焉。歲月光景。已在夢痕綠影中。且遊而不記及三四。至而僅記一二者甚夥。今付闕如。卽存者苦不文。懼不足以示人。予謂在道不在文。此記足爲後學導。且近世所未有也。去年居士以其稿就質於江西許止淨先生。先生爲之點定。今年秋。乃挾以示予。屬略叙其由而付手民。

予以校叢報中所刊之少分。則微有異同。承居士意爲次第焉。予少讀康樂子厚詩文。心輒慕之。饑驅四方。五嶽之願未酬。而吾衰已甚。故於居士此記。不能贊一辭。惟讀其匡廬遊記。有舊時東主子培長者摩尼院一段法緣。輒念先輩爲道之殷。而東林白社之清風高躅。尤縈繞於夢寐間。未獲一履其地。而徘徊之。顧瞻身世。唐喪放逸。資糧未具。愧居士多矣。甲戌冬月嘉興余了翁拜序

名山遊訪記自序

予業重障深。幼櫻痲疾。命等蜉蝣。偶遊雲臺山。遇高僧贈予教典。披讀之。如貧獲寶。似渴得泉。知三界無安。猶如火宅。人命危脆。不能偷安。始有懺悔。訪道朝禮。名山之志。乃謁普陀天臺。參禮敏曦鏡融二法師。旋往清涼山。卽境安心。似有入處。回詣寶華。參叩大霖律師。謂予宿有善因。施予甘露。因導至金山受戒。親近大定老人與融通上人。同寓經樓。日則閱藏。夜卽參禪。始知終朝喫飯。未嘗咬著一粒。竟日行脚。未曾動著一步。於是復往五臺山度夏。終南山經冬。凡溪流瀑布。均足以蕩滌胸襟。俾

得尋源味道。以非遊玩。故於山川勝蹟。未嘗考察。旋悟翠竹蒼松。溪聲山色。頭頭是道。脚脚有路。乃始約略記之。僅糟粕耳。民國元年。避亂滬上。狄楚青先生。提倡宗風。並辦佛經流通處。佛學叢報。魏梅蓀劉樸生諸先生。勸將參訪事跡編爲遊記。漢一乘先生。爲登入叢報。終愧屬辭未達。勝跡未周。因以中止。迨後王一亭聶雲臺簡玉階諸先生。勸予續編。又因家鄉水旱災荒。奔走鮮暇。目昏腦暈。色力復衰。遂多延擱。近年始勉就零落殘稿。掇拾湊成。藉副諸君子諄諄屬望之雅意。不免挂一漏萬。句差字訛。幸承許止淨居士慨與重治。復託余了翁先生整理成編。始得付刊。惟尙有十餘處記載。未遑釐定。天假以年。或尙可清理續之也。乙亥二月興化高恆松鶴年序於大覺精舍

增補名山游訪記序

名山游訪。志在參師求道。磨煉身心。良以人命無常。生死大事。故雖登山臨水。而不愛游觀。歷涉古蹟名勝。而未加詳考者。恐被分心。難以入道也。是以行雲流水。撥草

擔風曠野荒郊。不避酸風苦雨。深山大谷。那怕帶月披星。及至山中習靜。觸境逢緣。蒼松古柏。全露本地風光。鳥語花香。盡是當人自己。斗笠可以揚眉。草鞋亦能吐氣。然人事無常。丙午息足。金山之念佛樓。徐淮海發生水災。濟南上人含義會之命。勸余往勘災區。嗣於北鼎雲台。許願重修。及南鼎紫雲山。丁未視察春振。順游嵩岳。冬回金山。戊申設公帳房。一切自備。先修紫雲正殿。夏住九華。與性蓮上人。結茅於華台山。已酉春返里。重造紫雲佛殿。新裝海島。二十四諸天。四大菩薩。十八羅漢。仍回金山。過冬。庚戌春返劉。創建紫雲藏經閣。千華台。請藏經。圖書館。閱經室。善書報社。設念佛堂。立放生會。辛亥春。紫雲三元大帝裝金。新添佛神等像百餘尊。修理全山各殿。油漆一新。大工告竣。統交住持。所欠百餘千文。由余負責歸還。與紫雲無關。此願了矣。雲水而去。民元擬入山而未果。阻於滬上。復又混跡風塵。歷境驗心。彼時中外人士。避亂申江。具有道德思想者。頗不乏人。爲英雄之退步。作聖賢之入門。月霞法師。狄楚青。沈子培。濮一乘。陳彥通。姬佛陀。羅迦陵。及余等。提倡佛學。設立講經會。

於哈同花園。推余辦理其事。中外男女聽衆。至千百餘人。狄公與黎端甫。漢陳諸君。倡辦佛經流通。刊行佛學叢報。邀余相助。時李正剛。歐陽漸。蒯若木。濮一乘。諸公。辦佛教會。旋由寄禪和尚。及諸山長老。議設佛教總會。余爲之介紹聯合。並與譚閑法師。陳介石。王探臣。黎燦階。程靖武。及各國宗教家。梅殿華。李佳白。李提摩太。南條文雄。冠賽林諸公。設立世界宗教會。推余理事。余參加各會。純盡義務。故此小半游訪。大半在滬。比時初將名山游訪記。登載佛學叢報。至十二期。李梅庵。樊雲門。劉樸生。魏梅蓀諸先生。勸編成冊。自知文意不馴。詎敢遽災梨棗。惟曠觀世界人心。日下有名必爭。有利必奪。余感於此。故輒貢其愚忱也。夜闌人靜。檢點身心。自問見利雖不貪戀。而無形中難免圖名。且塵俗習氣。日熏於識。實無把握。令其不受。終以滬上。不慣久居。民三春。復去之北游。遠離塵囂。雲水飄飄。襟懷蕩蕩。名利不能纏。五欲不能縛。五台度夏。協助恆修。乘參二師。設立廣濟茅篷下院。開單結衆。息足修持。終南經冬。山中諸宿。邀余建造普同塔。創立念佛堂。迨民六京津水災。由狄楚青。王一亭諸

公電邀出山勘災至滬。與狄王二公。程雪樓。應季中。盛府朱葆三。虞洽卿。諸先生。奔走聯合。誦印二師。及江浙諸山。組織佛教慈悲會。推余助理其事。次春陪同治開上人。京津放振。余辦總務。事畢返申。簡玉階許止淨。諸公屢促。將遊記編冊。仍未許行。世。卽返終南。關中大亂。由他處繞道泰山度歲。次正南行。禮六祖。朝迦葉。後由鷄山歸里。掃墓。經李柏農長者。邀往蘇杭開辦道場。未許其願。因勸就里辦婦女道場。並提倡佛學。普度衆生。掃除習弊。懺悔我等有心無心之過愆。定名貞節淨土院。鳩工建築。開辦收容。旨在上報四恩。下資三有。嗣後疊遭水旱洩蝗等災。發願救濟。稍盡棉薄。剎那之間。忽又十餘載矣。其間復經簡玉階。沈惺叔。王一亭。李柏農。共交銀二千元。囑將初次行脚參訪。追憶略記。增補於後。塵事卒卒。延至於今。奈年事衰頹。精氣兩傷。所記片段。較前差脫益多。然又不得不以此因緣。與前編一併付印。以副簡沈王李諸公之願。吁。余詳細檢點。參學未徹。利濟未週。人事不知。名過其實。一生蹉跎。慚愧無地。數十載山林也野。石火電光。剎那過矣。故俟此編出世。諸緣已就。卽欲

送尸入山了此一身。方滿本願也。

民國三十二年初秋終南侍者鶴年高恆松謹識於雲溪大覺精舍

名山遊訪記續編序

大道無方。不可定指。說有說無。皆未能摸著巴鼻。古人爲欲究明此事。不惜多方以求。或七尺單前高挂鉢囊。或一肩明月遍走天涯。誓期於孤峯絕處轉得身來。方肯休歇。老友鶴年居士。同里劉莊人也。少卽飽學。篤志於道。雖居末季。力追古德之風。猶憶光緒庚子春。我山隱祖老人。重修慈壽塔成。適居士乞戒來山。住經樓閱藏。以禪意而參經旨。相互發明。日入大定。老人之室。請益道妙。了知文字。不在紙上。山上石頭。大的大小的小。全體透露。又何必拘於方所。於是矢願行脚。芒鞋棕笠。穿雲渡水而去。余時司職客堂佐理。癸卯戒事畢。每以有物礙膺。惴惴不能自安。且念居士以塵勞中人。尙能嶮然不滓。收放自如。余寄跡空門。反生縛著。不能超脫。未免墮入死水。何日可了。興念及此。隨時蹶然而起。打包上肩。覺腰脚輕健。跋涉無勞。因之踏

五台之冰。破峨眉之雪。三叉路口。較量一番。百草頭邊。爭取一着。及後游倦歸來。雖漫無所得。而草鞋錢。幸可相抵。不致爲目前境界所弄。居士則更勝我百倍。北走幽燕。南入滇黔。結茅終南。休夏清涼。枕青山而臥白雲。侶樵牧而友麋鹿。其受用之處。洵非他人所得而測。然觀其忘鄉里而不戀。化家庭而歸公。以私人整個田宅。創辦貞節淨土院。爲天下學佛者導。世皆稱其難能。而居士行之易。此正所以爲居士也。居士今年壽七十二。余亦六十有四。皆垂垂老矣。而於難期之後。能兩度相見。俯仰時事。不勝感慨。而叢林秋晚。老成凋謝。尤爲今後法門悲。居士著有游訪記。風行海內已久。茲者續編。又將刊行。馳函欲余一言。余年來枯坐寒巖。久守緘默。惟於居士則不得不一道款曲云。

民國三十二年冬月二十八日金山石隱頭陀霜亭序於楞伽丈室

名山遊訪記目錄

卷一

由湖州經九華白嶽至黃山天目山遊訪記

由杭州經雁蕩轉天台各遊訪記

由普陀至天台各遊訪記

由終南經棧道入川至峨嵋山遊訪略記

峨嵋山遊訪記

卷二

金陵京口諸山遊訪略記

天津北京遊訪略記

五臺山遊訪記

山西諸山遊訪略記

陝西諸山遊訪略記

終南山經冬略記

長安遊訪略記

西嶽遊訪記

由陝西至武當遊訪略記

卷二

由滬至匡廬遊訪略記

武漢遊訪略記

京漢道上遊訪略記

五臺山遊訪記

由五臺至南嶽道經鄂湘遊訪略記

卷四

南嶽遊訪記

由南嶽回滬經湖南遊訪略記

普陀山遊訪記

北京上方山涿州白帶山各遊訪記

由北京張家口往北嶽恆山遊訪略記
由北嶽經五臺太華回終南山遊訪略記

由終南山往京津勸災放賑回終南略記

卷五

灌雲縣雲臺山及沿海諸島各遊訪記
用雲臺經勞山至岱嶽各遊訪記
由泰山往孔林遊記

九華山遊訪記

卷六

從廣州三水至鼎湖山遊訪記
廣州往曹溪遊訪記
由香港經安南至雲南雞足山遊訪記
羅浮山遊訪記

沌門杯渡山遊訪記

天臺雁蕩二山遊訪記

由九華至黃山遊訪記

雲居遊訪遂至匡廬記

潮州韓山遊訪記

附參訪事實略記

卷七補編

從海州春賑畢往嵩山遊訪記

由廬山往南昌西山朝雲居禮四五祖記

記

由淮安經揚鎮過寶華朝大茅山記

由大茅山經磬山龍池經白雀山至杭州記

州記

由圖山經惠泉靈岩鄧尉洞庭山遊訪記

記

湘南放賑順禮衡山回往九華遊訪記

附錄

名山遊訪記卷一

高鶴年撰

許止淨參訂

余了翁校閱

由湖州經九華白岳至黃山各遊訪記

光緒二十年甲午三月初十日。天氣晴和。遊道場山萬壽寺。岩谷清幽。秀出雲表。開山者伏虎禪師。中有龍池如鏡。嶺上有塔五級。登臨遙觀。太湖汪洋一片。湖州卽在眼底。頃刻風起雲湧。瀾漫不見。白雲本是無心物。卻被清風引出來。如身境根塵。本無一物。由無明風動。能見能現也。下山十里。湖州府位居太湖東南。進南門。出青銅門。朝禮觀音山。松竹載道。白雀寺在焉。寺宇宏大。香火甚盛。十一日出西門。乘夜行船。三十里。四安塘。五十里。順林橋。舟中客談。世人知求利之害。而不知好名爲害尤甚。利害粗而易見。名害細而難知。若有暗室虧心。神目如電也。言次到岸。十二